

Fasnecht 2017

Sujet:

Jedem sis Bier!



Ä jede nimmt gärne chli vo däm edle Tropfe
Es wunderbars Gebräu, us Wasser, Malz und Hopfe
Goldgääl im Glas und dr Schuum darf nid fehle
So fliest das wunderbare Elixier durch unseri Kehle

D Hefe bringt dr Gärigs-Prozess in gang
Bis Zucker zu Alkohol wird, gohts no lang
Doch die ganzi Zyt und Liebi wird sich lohne
Den schliesslich prägt s Bier ganzi Regione

Es wunderbars Bier chasch eifach überall konsumiere
Öb am Match, däheim oder au mol in dr Uni bim studiere
Fascht bi allem hilfsts und duet Hemmige ad akta lege
Denn meint fast jede Maa er cha sich zur Musik bewege

Frühner het me s Bier mit dr Bahn lo cho
Hüt muesch nur no uf Lause, Ziefe oder Lieschtel go
Es git immer meh wos selber düend kreiere
Es tuet au grad wieder diä negsti Generation fasziniere

Ob Guinness, Weissbier oder Feldschlössli Light
Alles zämme macht dr Ranze rund und s Füdle breit
Nimmsch aber eis us dr Region, denn wirsch es merke
Dr Ranze goht äweg und es duet dies Six-Pack sterke

Au mir wänn braue und unser eiges Bier produziere
Mit unserem alte Wage chönnte mirs au transportiere
Nur öppis hän mir vergässe und es lieggt uns schwer uf em Mage
Ä Brauerei sött me zerst ha, no vor em Isebahnwaage

Di ganze Vorbereitige für nüt, s Chnobi-Bräu chunnt nid uf e Märt
Wieso het uns das eigentlich keine vorher erklärt
Drum düen mir euse Waage in Lieschtel präsentiere
Und unseri Mithilf bim Transport anderne offeriere

D Konkurrenz isch sowieso riesegross
Do hätte mir doch überhaupt kei Chance
Ob Baselbieter, Stedli Bier, Rocha oder Ruechesaft
Scho elei für d Namensgebige fehlte eus d Chraft

Zum Schluss isches wichtig das JEDE SIS BIER cha finde
Und eis dr ganze Schwiz uf d Nase binde
Jede weiss es und s isch überall bekannt
S beschte Bier chunt sowieso usem Baselland